

Kalaallit Nunaanni sullivinni avatangiisit pillugit inatsisip allanngortinneqarnissaa pillugu inatsimmut oqaaseqaatissaq pillugu Inatsiartut aalajangiiffigisassaattut siunnersuut**Akissuteqaat**

(Inuussutissarsiornermut Aatsitassanullu Naalakkersuisoq)

Aappassaaneerneqarnera

Sullivinni avatangiisit pillugit inatsisip allanngortinneqarnissaata Kalaallit Nunaanni atuutilernissaa pillugu Inatsiartunit aalajangiiffigineqarnissaanut Naalakkersuisut inassutigisaat Inatsiartut Inuussutissarsiornermut Ataatsimiititaliaata isumaqataanera pillugu qutsavigaara.

UPA2012-imi 16. april siullermeerneqarnerata kingorna aalajangiiffigisassatut siunnersuut Inatsiartut Inuussutissarsiornermut Ataatsimiititaliaani sammineqarsimavoq.

Inatsiartut Inuussutissarsiornermut Ataatsimiititaliaata isumaliuutissiissutini tunniutereerpaa, tassanilu allassimalluni sullivinni avatangiisitigut malittarisassat atuuttut nutarterneqarnissaat pillugu suliniuteqartoqarnera ataatsimiititaliap pitsaasutut isigigaa.

Sullivinni avatangiisit pillugit inatsisip ilaanik unioqqutitsinermi sulisitsisup pinerluttulerinermi inatsisitigut akisussaaffii sakkukillisinnissaat ataatsimiititaliap naleqquttutut isigaa, sullivimmi avatangiisit pitsaasuunissaat isumannaatsuunissaallu qulakkeerniarlugit sulisitsisup sapinngisani tamaat atorlugu iliuuseqarsimasoq tassani uppersarneqarsinnaappat. Ataatsimiititaliap aamma maluginiarpaa, sullivimmi avatangiisit pillugit malittarisassat atuuttut piaaraluni imaluunniit annertuumik mianersuaalliornikkut sulisut suusupagisimappatigit pinerluttulerinermi inatsisitigut akisussaaffiisa sakkortusineqarnissaannik siunnersuut aamma imaqartoq.

Ataatsimiititaliaq paasinnippoq inatsisip atuuttup kingunerisinnaagaa, sulisup sullivimmi avatangiisit pillugit inatsimmik unioqqutitsinera sulisitsisumut pineqaatississutaasinnaasoq. Tamatumani sullivinni avatangiisit pillugit inatsisip malitsigisaanik pisussaaffiit suulluunnit sulisitsisup eqquutsissimagaluarpagilluunniit apeqqutaatinnagu. Sulisup sullivimmi avatangiisit pillugit inatsimmik unioqqutitsinera sulisitsisup pineqaatissinneqarsinnaanera ataatsimiititaliap pissusissamisuunngitsutut isumaqarfigaa. Periarfissaq tamanna tulluutinnngitsutut isikkoqarsorinarpoq, taamaammallu tamatuma inatsisissatut siunnersuutikkut iluarsiniarneqarnissaa ataatsimiititaliap isumaqataaffigaa.

Taamattaq ataatsimiititaliaq isumaqarpoq tulluututullu isigalugu, pisuni sulisut sullivimmi ajutoornikkut toquppata imaluunniit annertuumik ajoquserneqarpata inatsimmik sakkortusineqassasoq.

Tamatumunnga atatillugu, inatsisitut allannguutissaq akuerineqassasoq inuussutissarsiornermut ataatsimiititaliap pingaaruteqartutut isigaa, taamaalilluni

malugineqassamat sulinermit ajutoornerit annertuut sapinngisamik
killilersimaartinneqarnissaat inuiaqatigiit kalaallit kissaatigigaat, taamaammallu sullivimmi
avatangiisit pillugit inatsisip unioqqutinnera toqumik kinguneqartillugu akisussaasumut
sakkortuumik kinguneqartitsisoqartariaqartoq.

Inuussutissarsiornermut ataatsimiititaliap naatsorsuutiginnitsoorsinnaanngilaa sullivimmi
avatangiisitigut suliaassani pinerluuteqarnermik inatsimmi iliuuserineqartussatut
allannguutissatut siunnersuutigineqartut politiini aamma unnerluussisuni killeqartumik
anigaasartuuteqarnerunermik kinguneqarsinnaasut. Tamanna Namminersorlutik
Oqartussanut anigaasartuuteqarnerunerannik kinguneqassasut ataatsimiititaliaq
isumaqanngilaq.

Ataatsimiititaliaq tamarmiulluni isumaqatigiilluni siunnersuutip akuerineqarnissaa
inassutigaa.

Inuussutissarsiornermut Ataatsimiititaliap inassutigisaa Naalakkersuisut tapersorsorpaa,
matumuunalu Inatsisartunut inassutigalugu aalajangiissasut, Kalaallit Nunaanni sullivinni
avatangiisit pillugit inatsisip allanngortinnissaanut siunnersuutip Kalaallit Nunaannut
atuutilernissaa pillugu Namminersorlutik Oqartussat akuerissagaat.